

Ս. ԱՍՏՎԱԾԱԾՆԻ ՎԵՐԱՓՈԽՄԱՆ ՏՈՆԸ ՀՆԴԿԱՀԱՅ ԳԱՂՈՒԹՈՒՄ

Օգոստոսի 12-ը՝ Ս. Աստվածածնի Վերափոխման տոնի օրը, պատմական և նշանակալից էր հնդկահայ գաղութի համար: Վերածնունդից հետո առաջին անգամ Ս. Պատարագ մատուցվեց երբեմնի հայաշատ Սայդաբաղի Ս. Աստվածածին հայկական եկեղեցում: Օրվա պատարագիչն էր հնդկահայոց հոգևոր հովիվ և Հայոց Մարդասիրական Ճեմարանի կառավարիչ Ս. Օշական վրդ. Գյուլգյուլյանը: Հայր Սուրբին սպասավորում էր Մայր Աթոռ Սուրբ Էջմիածնի միաբան Հարություն սրկ. Համբարձումյանը:

Սայդաբաղի Ս. Աստվածածին եկեղեցին կառուցվել է 1758 թ. Զուղայեցի նշանավոր վաճառական, բարեգործ Խոջա Պետրոս Հարությունյանի անձնական միջոցներով՝ ի հիշատակ իր ծնողների: Անցած տարի Կալկաթայի նորընտիր Եկեղեցական վարչության նախաձեռնությամբ ամբողջովին վերանորոգվել է եկեղեցին, կառուցվել նոր զանգակատուն և հյուրատուն, բարեկարգվել է եկեղեցու ընդարձակ տարածքը և հայ համայնքին են վերադարձվել համայնքապատկան հողատարածքները:

2007 թ. մարտի 4-ին Հնդկաստանի և Ծայրագույն Արևելքի Հայրապետական պատվիրակ Ս. Ադան արքեպս. Պալիոզյանի ձեռամբ օծվեցին Ս. Աստվածածին վերանորոգված եկեղեցու Ս. Սեդանը և պուների 16 խաչերը:

Վերափոխման այսօրվա տոնը հնդկահայերի համար հատկանշական էր նաև նրանով, որ սկզբնավորվեց ևս մեկ ավանդույթ. խաղողօրհնության տոնը հռչակվեց որպես Սայդաբաղի Ս. Աստվածածին եկեղեցու ուխտի օր:

Հըրթաց սրբազան արարողության պատարագիչ Հայր Սուրբը հավուր պատշաճի քարոզ խոսեց: Նա ջերմորեն շնորհավորեց ներկաներին հիշարժան օրվա կապակցությամբ՝ ընդգծելով, որ արդեն հինգ տասնամյակ է, ինչ այս հոյակերտ տաճարում որևէ եկեղեցական արարողություն չէր կատարվել, նույնիսկ հայ քրիստոնյայի շուրթերից աղոթք չէր հնչել, սակայն այսօր կրկին վերագարթոնք և ցնծություն է ամենքի հոգիներում՝ այս սուրբ խորանը լցնելով աղոթքի և խունկի անուշ բույրով: Օշական վարդապետը նաև իր գնահատանքի խոսքը հայտնեց Կալկաթայի Եկեղեցական վարչության անդամներին, որոնց ջանքերի շնորհիվ նորոգվում են Հնդկաստանի խոնարհված հայկական եկեղեցիները և բարելավվում է համայնքային կյանքը:

Սրբազան արարողության ավարտին, Հայոց Եկեղեցու ընկալյալ ավանդության համաձայն, կատարվեց խաղողօրհնեք: Օրհնված խաղողը բաժանվեց եկեղեցում հավաքվածներին:

Ս. Պատարագի վերջում տեղի ունեցավ հյուրասիրություն, որ կազմակերպել էր Կալկաթայի Եկեղեցական վարչությունը:

Արարողությանը ներկա էին Կալկաթայի Եկեղեցական վարչության անդամները, Մարդասիրական Ճեմարանի սաները, ուսուցչական կազմը, հնդկահայեր և հյուրեր: